

Cantidad di permisonan pa trailer lo ta limita y tombola lo por dicidi

Sistema comunista di Gobierno ta caba cu Carnaval

****Gruponan di Carnaval mester bay cobra Gobierno pasobra nan ta participa?*

****Carnaval lo bay bira fiesta pa esnan cu por paga so*

ORANJESTAD(AAN)--

"Awor Pueblo mester paga pa mira Carnaval, cu ta un fiesta tradicional di Pueblo. Ta unda nos ta bay? Caminda pa Comunismo?" Esaki ta loke a worde treci dilanti pa un grupo di persona, cu ta colabora na diferente forma cu Carnaval, pero awor a lanza critica severo ariba e forma cu Gobierno a dicidi di atende cu Carnaval.

Nan a visualisa cu e asunto di permiso di trailer, manera Gobierno a introducie, lo bay

crea problema severo. Manera nan a splica DIARIO, aparentemente ta 300 persona so lo por haya permiso pa pone trailer y si resulta cu mas di 300 persona entrega solicitud, lo mester saca esnan cu ta haya permiso via tombola. Pero antemano tur hende mester paga 4 Florin ora nan haci e peticion.

Tur dia lo atende 50 persona na Domeinbeheer y esnan cu yega promer lo por haci e promer escogencia. Esaki ta algo cu a causa disgusto tambe, pasobra ta free for all lo tin pa yega promer pa haya e sitio cu kier.

"Carnaval ta pa e grandinan so y no pa e chikitanan? Pa esun cu tin manera di paga y esun cu no por paga mester keda cas?" e grupo di ciudadanonan a puntra. Nan a referi na e sumanan halto cu

Gobierno a dicidi di introduci y a bisa cu esun cu paga por pone su trailer y despues e mester keda patras, mientras esnan cu bini cu stul por cay sinta dilanti di esnan cu mester a paga.

E personanan aki a considera e asunto aki inhusto y un sistema cu ta bay trece problema y bringamento, cu ta bay bira problema pa e celebracion di Carnaval na un forma di hende civiliza manera semper Aruba a conoce.

Nan a puntra kico lo pasa si lidernan di grupo tambe dicidi di cobra Gobierno como cu ta nan ta esun cu ta trece Carnaval. E ora lo no tin Carnaval mas y lo por bisa cu Gobierno a caba cu Carnaval. "Pakico tanto ridiculez awor cu nos Carnaval ta na top?" nan a puntra.

Na opinion di e

ciudadanonan tur hende mester a para ariba cu nan no ta bay pidi permiso y bay para mira e parada manera antes y bay cas. Of join un grupo y celebra carnaval asina.

Nan a pidi gruponan pa sinta na mesa y defende e pueblo carnavalesco, pasobra publico tey pa anima gruponan y no pa paga pa mira gruponan. Un suplica a bay na gobernantenan pa trece paz. Ta trata di un temporada duro pa e Pueblo. Pasco ta tras di lomba y mester paga number di auto, asegurado di auto y hopi otro gasto. Ainda Gobierno ta pidi Pueblo haci mas gasto, cu kizas no por.

E grupo di ciudadano ta pidi Gobierno pa habri su wowo y no perhudica e Pueblo cu a pone gobernantenan caminda nan ta. Pensa ariba e personanan di edad avanza, cu

tambe kier mira Carnaval.

E grupo ta spera di mira cambio ariba e decision, cu no ta cumbini den ningun sentido. Si ta posible, na nan parecer mester haci e ruta mas largo pa asina tur hende haya un lugar sin tin mester di paga.